

La terra, heri, de peste fo do, uno a San Ieremia et l'altro a San Salvador, che è stà 7 zorni sana, senza alcun mal.

Il mal de petechie è tornato in questa terra, che è stà alcuni mexi che era cessato; et tra li altri, sier Francesco da chà da Pexaro fo podestà a Padoa qu. sier Marco, de età de anni . . . , ha petechie.

4* Da poi disnar, fo Conseio di X con la Zonta.

Fu proposto uno mercà de fave vol far sier Antonio da chà da Pexaro qu. sier Alvise et compagni, de stara 8000 de Alexandria, a lire . . . el staro, a darlo . . . Et perchè non era sier Hironimo da Pexaro cao di X, fo fatto vicecao sier Lorenzo Bragadin una volta et non fu preso. *Item*, per un'altra parte fu fatto *etiam* vicecao in loco del ditto sier Hironimo da Pexaro, et non fu preso.

Fu trattato vender uno caxal in Cipro chiamato Aschia, qual dà intrada ducati . . . , in feudo a . . . per 100, per ducati 15 milia. Et perchè do el vol, fo disputation; et sono questi: domino Zuan Nores el cavalier et domino Piero Podacataro el cavalier, qual vol dar più de l'altro.

A dì 3, la matina. Entroe avogador de Comun, in loco de sier Michiel Trevixan, sier Marin Justinian de sier Sebastiano el cavalier.

Vene a la Signoria sier Zuan Pixani qu. sier Alvise procurator, electo procurator de la chiezia de San Marco, et dia entrar adesso. Era vestito de panno negro a manege ducal, acompagnato da 18 procuratori, mancava sier Lunardo Mocenigo, sier Lorenzo Loredan, sier Andrea Justinian è fuora de la terra, sier Piero Marzello et sier Antonio Mocenigo, poi altri patrici parenti et assà zoveni vestiti scarlatto, et era el reverendissimo patriarca nostro sentato in Collegio; et da poi el Serenissimo li usò alcune parole, qual è marido de la fia de suo fio, et li dete le chiave de la procuratia, et disse è assà chiave et pochi danari, però che al presente de la chiezia de San Marco sono . . . procuratori. Da poi li fo dato sacramento de observar el suo capitolar, et tolto licentia, montoe in barea, et tutti de scarlato se spoiono, et fece pasto a zerca 40 parenti et amici.

Vene, come ho ditto, el reverendissimo patriarca nostro, per certa differentia ha con preti de le chiesie, qual vol elezer a suo modo contra li ordini, et parloe.

Di Trevi, fo lettere de sier Polo Nani provveditor zeneral, di primo. Come aspectava li danari, li è stà scritto. Et ehe monsignor di San Polo li ha mandato a rechieder fanti 1500 perchè el vol tuor la impresa de (*Serravalle*) . . .

Da Alexandria, di sier Francesco Contarini orator a monsignor di San Polo, di . . .

Come monsignor vuol tuor l'impresa de Serravalle, et ha mandà a tuor 1000 fanti nel nostro campo, zoè a Trevi. *Item*, ha inteso, per lettere di Fiorenza li avisa spagnoli voleno venir in Toscana, poi in la Lombardia, unde ha expedito lettere in Franza. Et scrive avisi de Zenoa . . .

Vene l'orator de Fiorenza, per saper de novo, dicendo ha inteso heri vene lettere de l'orator nostro a Fiorenza, de 25, et lui ha *solum* de 21; et il Serenissimo li disse quanto era de novo.

Fu, poi letto in Collegio le lettere, consultato per i Savi de scriver hozi in Franza, et *etiam* una al Capitano zeneral nostro.

Da poi disnar, fo Pregadi, et non fo fatto alcuna cosa de quello era stà terminato de far; ma poi letto le lettere soprascripte, li Savi entrò sopra provision de danari, sicome dirò de sotto.

Fu posto, per li Savi del Conseio et sier Zuan Francesco Badoer savio a Terra ferma, una tansa al Monte del Subsidio, a pagar in termine *ut in parte* con don di 10 per 100.

Et sier Zuan Contarini savio a Terra ferma vol sia posto soldi 10 per campo per tutta terra ferma. Una parte molto longa, *ut in ea*; qual è persi.

Et sier Zuan Dolfin et sier Marco Antonio Corner savi a Terra ferma voleno la parte sopraditta, con questo sia *etiam* posto una tansa a restituir li danari del dazio del vin, con don a quelli la pageranno di 10 per 100.

Et sier Lunardo Emo el consier, vol la sua parte, che 'l sia tolto et tansà tutta terra ferma ducati 200 milia, da esser electi 7 honorevoli zentilhomeni 5* nostri, per scurtinio de questo Conseio, con pena, quali debbano aldir quelli intervenirà per le terre et territori, et far la compartition, *ita* che se habbi la ditta summa.

Et primo parloe sier Andrea Trevixan el cavalier, savio del Conseio, per la parte de la tansa al Monte del Subsidio, biasemando le altre opinion per adesso.

Et li rispose sier Lunardo Emo el consier, laudando la soa parte, de la qual se haverà ducati 200 milia, et non metter una tansa per non haver danari et cargar la terra.

Et poi parlò sier Zuan Contarini savio a Terra ferma per la soa opinione, qual è universal, et se troveria assà danari, la qual fo messa del 1500, soldi 5 per campo.